

Wurkapm a Pol ro kai ekg tu Kolosi

¹ Kupm Pol, kupm melnum yangkipm kuinen a Jisas Kraiss. Kai wakrong a Maur Wailen kil kweopm tukol melnum yangkipm kuinen alkilen. Kupm nti Timoti, wasok a men kai nang a Kraiss. ² Mentekg ro wurkapm kil kai ekg kipm yanipopm muitnwar a mentekg kai nang a Kraiss, kipm a atn wri wor ukpma Kraiss kai ha wail Kolosi. Kupm ropon Maur Wailen, Yan alpmenen ekg al kil reinjepm yatom ntekg kipm arpm namponen ipma mehen wor.

Ropon ukwor Maur Wailen

³ Mentekg aklei wang ukwor Maur Wailen, Yan a Wailen Jisas Kraiss alpmenen, ak wang a men ropon Maur Wailen ekg kil aklinjepm. ⁴ Mentekg ukwor Maur Wailen pati ekg mentekg atning a kipm ukpma Kraiss Jisas wa mentekg atning a kipm wakrongen tu kinkpman wrongwaillet wri wor a Maur Wailen. ⁵ Kipm ukpma ariworwor arpm nungkwangen kweiur kweiur worwor a Maur Wailen kil numprampen ikghlen elntho kaino ha wor ai. Tolpa ti kipm arpm nungkwangen ekg wi. Kipm pike atning katnun yangkipm wor aklahle a Maur Wailen pa yatom, kipm ukpma arpm nungkwangen pake. ⁶ Pike tu melnum ye yangkipm wor pa ye kaintepm pake. Yangkipm wor pa kai hor ha knokg wrongwaillet ti, yatom paln wail nip wor kaino wail ngko

ek arke hor knokg ti ase. Apm tol pike hep a kipm yat atning kai ha alkipmen pake. Kipm atning yangkipm wor aklahle a ipma wor a Maur Wailen pa, yatom kipm atning wi ariworwor om katnun pa. ⁷ Epapras kil ro tukgunakg lngkep a kipm ti om kipm wi arie worwor pa. Kil pa melnum akwapel wor a Kraiss alpmenen, kil ak kwap wrij tukol men ti, kil laron yangkipm wor a Kraiss pa ak aklin kipm pake. ⁸ Apm pike Epapras kil pa wa la kiti nasi mentekg ti tolpa Maur Wor ak kwap kai kipm pa, yatom kipm ukpma wor wakrongen tita pake.

Ukpma Maur Wailen pa itn titnongket

⁹ Tolpa yatom, ak wang a mentekg atning a tu la kiti kipm pa tolpa, ake wa mentekg elnten a kwe Maur Wailen ekg kil aklinjepm pa. Mentekg ropon ekg al kipm wi arie ekg kweiur kweiur wrongwaillet a kil wakrongen pa ntie yekworwor, ekg al Maur Wor ukwepm arie a nikgwalm wonrekele worwor wrongwaillet pa. ¹⁰ Wa mentekg ropon Maur Wailen ekg al arpm alkipmen pa paln wor kai ikg a Wailen ekg kil kporn yangkipm. Wa kipm wi arie a Maur Wailen pa yatom kipm ik iken kwap wor ekg kil pa, pa tol kipm ngko ek arke wor kai kwap wrongwaillet a kipm ntekg pa, wa kipm wi arie a nikgwalm wor a Maur Wailen pa atn lan lan. ¹¹ Wa mentekg ropon Maur Wailen ekg al kil ak titnongketel kipm pa kai ya waillet ak titnongket a klalen wailmanten alkilen pa, yatom ti tol kalkut tiur akal palntepm pa, kipm ntie ekg arpm mehen ye kalkut pa namponen

ipma utopen pa, ¹² om al kipm ukwor utopen Yan God ekg kil ntekg kipm ntie ekg wi kweiur kweiur worwor alkipmen a kil numprampen ekg tu wrong kinkpman alkilen a atn kahor kingdom alkilen ai. ¹³ Maur Wailen kil kwan titnongket a Maur Paitn Satan atn wailen ikghlen nikgwalpm alpmenen a yipowo kai mninget pa kai tukulein, wa kil wiyo kai pa ye kul kai ekg Warim Kpman alkil a kil wakrongen paitn ai atn wailen ikghlen nikgwalpm alpmenen. ¹⁴ Warim Kpman pa kil akarmpen paitnpaitn alpmenen plaln ase, om kwan paitnpaitn alpmenen ti ase.

Krais atn Wailen ekg ikghlen kweiur kweiur wrongwailet

¹⁵ Mento ake ntie ekg ari Maur Wailen pa, pake mento ari Krais pa apm hirhir tukul Maur Wailen pake. Kil pa warim atn hep akil apm pike arpm hep ak ai arpm pake, ktnong a knokg a kweiur kweiur wrongwailet a Maur Wailen ntekg pati pa pike paln kanukg. ¹⁶ Maur Wailen apm nti kil pa ntekg kweiur kweiur wrongwailet: kweiur kweiur a atn kaino ktnong ai, a atn knokg ti, kweiur kweiur a ari ak ikg, a kweiur kweiur a ake ntie ekg ari tukul tu mring maur a maur a kweiur kweiur wrongwailet a ntie titnongket ekg ikghlen knokg ti. Kweiur kweiur wrongwailet pa pike Maur Wailen nti Krais pa ntekg pake, wa kweiur kweiur wrongwailet a kat nang a Krais pake. ¹⁷ Kil pike arpm hep ak ai, a kweiur kweiur wrongwailet ti pa paln kanukg. Yatom apm kil alkil pa wamparpm kweiur kweiur wrongwailet pa ikghlen ye atn

pake. ¹⁸ Mento kinkpman wrongwaillet a Maur Wailen pa, mento tukol numpwam alkilen. Wa kil alkil pa tukgunakgen a numpwam ti. Kil pike mo pake kil wa wreitn hep, tolpa om kil alkil pa atn tukgunakgen ekg kweiur kweiur wrongwaillet. ¹⁹ Maur Wailen pa kil utopen paitn wrijen ekg kil wi wrik arpm wail kahor Warim Kpman alkilen pake. ²⁰ Maur Wailen yipon kla ekg akwi kweiur kweiur wrongwaillet a atn knokg ti a atn kaino ktnong ai ye kai hor wrij kor tita hor ya a Warim Kpman alkilen pake. Kil kwawel mo kai yo kwatingki pa yatom walmpopm a kil pa unkwawen yatom ak kwan ipma wakget a Maur Wailen atn ekg mento wrongwaillet pa kai paln.

²¹ Kipm pike hep pa, kipm pike atn kai watin ai ntekg paitnpaitn wi wrongmnto lan Maur Wailen. ²² Kraiss kil paln melnum tukol mento ti, yatom kil mo kai yo kwatingki ak kwan ipma wakget a Maur Wailen a atn ekg kipm pa, yatom kil ntekg kipm ti paln wri wor, paitnpaitn pa kalpm, kai ikg a Maur Wailen. Wa ake al mla ur arkiepm tolpa kipm paitn pa, kalpm. ²³ Pake kipm al ukpma Maur Wailen pa itn titnongket ye kai tukol yo a kli yipoko eln kinar knokg wonen ai yatom nampil knokg atn titnongket pa. Wa kipm ukpma irpm nungkwangen kuina ur a kipm atning a tu laron yangkipm wor a Maur Wailen nasepm pa, pa ampur kipm nuhorn. Yangkipm wor pa pike tu laron nasi tu kinkpman wrongwaillet hor knokg ti. Kupm alkupm ti apm pike paln melnum akwapel a laron yangkipm wor pake.

Pol kil aclin tu wrong kinkpman a Maur Wailen kai Kolosi

²⁴ Ak wang ti pa, kupm utopen ekg ye kalkut ekg aclin kipm pake. Kupm wa utopen yat ekg uk num a kupm alkupm ti kai ekg ye kalkut tiur a pike Kraiss kil ye pa tolpa kai ekg aclin tu wrong kinkpman a Maur Wailen pa, tu tukol num a Kraiss pake. ²⁵ Kupm pike Maur Wailen kil kweopm hep ak ai, yatom kupm paln melnum akwapel alkilen ekg aclinjepm ekg laron yangkipm wor alkilen ti klalen hmpreket wor nasi tu wrong kinkpman a Maur Wailen. ²⁶ Nikgwalpm a Maur Wailen kil pa pike atn hampen ekg tu yohmpei a mamikgmamin manjan ak ai kul ai. Pake ak wang ti pa, kil laron ngko wurknong ekg tu wrong kinkpman wri wor alkilen pake. ²⁷ Kai tu pa, Maur Wailen kil pike yipon yangkipm ak wakrong alkilen hep ase tolpa, kil hi laron ngko wurknong nikgwalpm a kweiur kweiur waillet worwor a atn hampen pa kul kai ngko wurknong ekg tu wrongwaillet a ake Juta pa yat. Nikgwalpm hampen pa pati, la tolpa Kraiss kil arpm kahor ipma wonen a kipm ti, yatom ti kipm ukpma arpm nungkwangen ekg al kil wiyepm ye kai arpm ntiel, om al kipm wi kweiur kweiur worwor alkilen ai a arpm kaino ha wor alkilen. ²⁸ Men laron yangkipm wor pa nasi tu wrongwaillet a rowen tukgunakg lngkep ekg ya wor, a tukulein ya paitn ak nikgwalpm arie worwor, tolpa ekg al tu wreitn wail nikgwalpm arke wonrekele wi arie Kraiss ti ariworwor, pa men wiyen ye kai atn hor wrij namponen Kraiss. ²⁹ Tolpa yatom

kupm aken kwap a laron yangkipm a Maur Wailen titnongket ak titnongket a Kraiss a ak kwap titnongket minjirangket kahor kupm ti.

2

Ukpma itn titnongket talpulu yangkipm akplain

¹ Kupm wakrongen tolpa, kipi ari kupm a hmurkg wampenen ak kwap ekg aklin kipi pa, wa tu a ark kai ha wail Laotisia, wa tu wrongwaillet a ake ari ikgek a kupm ti yat. ² Yiprokgen a kupm ak tolpa pati, kupm ak ekg akal ak titnongketel nkgwalpm a tu pa ekg al tu ukpma wor wakrongen tita, ekg al tu wi nkgwalpm arie wor kai itn yiprokgen a nkgwalpm wrongwaillet. Ekg al tu ari nkgwalpm hampen a Maur Wailen pa. Nkgwalpm ariworwor hampen wrongwaillet pa apm Kraiss kil alkil pake. ³ Kai kil pa, kil melnum yiprokgen a arie nkgwalpm wonrekele worwor pa apm arpm hampen kai kil pake.

⁴ Kupm la nasepm yangkipm a Kraiss kil pa, ekg nte kupm kark ekg hi wa tu tiur manet ai ukwepm yangkipm ur manet a atning wor kai nungkulkg alkipmen ti yatom wa rkolin kipi ti ye kai hor ya paitn pa. ⁵ Tol kupm ake ntepm arpm, pake nkgwalpm wail alkipmen kil pa apm ark ekg kipi pa arpm kai pake. Tolpa ti kupm utopen ekg kupm atning a kipi hor wrij arpm wor katnun yangkipm a Maur Wailen, wa kipi ukpma Kraiss pa atn titnongket pa.

Ukpma Kraiss pa itn titnongket tolpa ye kai om

⁶ Kipm wi Krajs Jisas tukol Wailen alkipmen ase, tolpa ti ampur kipm elnten, kipm kutnun kil pa itning yangkipm pa tolpa ye kai om! ⁷ Kipm ukpma Krajs pa itn titnongket tukol yo klung a kli yipoko ningnakg alkil pa eln kinar ak nampil knokg. Wa kipm ukpma kil pa itn titnongket tolpa ye kai pa, pa tol a kipm atn le wan hel hong kmpoen wor pa itn ye tolpa ye kai om. Tol a pike men rowepm tukgunakg lngkep ase. Ti ipma wonen alkipmen ti al utopen wailmanten wa ukwor kil pa.

⁸ Kipm irpm wonirpme ekg hi wa tu melnum tiur akepmplain lokepm ye kai hor ya waillet katnun nikgwalpm arie akplain a tu pa. Nikgwalpm arie akplain pa tu wi kai tu mamikgmamin manjan a tu mring maur a maur akplain a ikghlen ktnong a knokg, pa ake arie wor a Krajs pa.

⁹ Maur Wailen pa apm arpm kahor Krajs pake. Kil wi numpalk tukol mento melnum ti, pake kweiur kweiur wrongwaillet a Maur Wailen pa apm arpm kahor wonen a kil pake. ¹⁰ Wa Krajs pa arpm wail kai kipm ti yatom kipm ntie ekg ntekg kweiur kweiur wrongwaillet. Kil pa atn tukgunakgen ikghlen kweiur kweiur wrongwaillet. Kil atn wailen ikghlen tu mring maur a maur a kweiur kweiur wrongwaillet a ntie titnongket pa. ¹¹ Kipm ukpma Jisas pa, pa tukol kil kwat numpalk a kipm pa aklahle ekg kwan titnongket a paitnpaitn a ak yipowepm pa. Pa ake kweiur a melnum ur ntekg pa, kalpm. Krajs, kil pa kwan paitnpaitn a mento pa, om kil alkil pa kwat numpalk a mento aklahle. ¹² Wa

tol tu pike kalukepm kai nang a Kraiss pa, pa plan tol kipm mo namponen Kraiss pa ase, yatom uwentepm kai kirkhap pa ase. Wa kipm ukpma tolpa, titnongket a Maur Wailen pa nti, om kil la yatom kipm nti Kraiss wreitn atn. Pa tol pike Maur Wailen kil la yatom Kraiss kil wa wreitn atn pa. ¹³ Kipm pike ntekg paitnpaitn atn pa yatom paitnpaitn alkipmen pa ntekg maur wor alkipmen pa apm mo ase. Pake Maur Wailen wa ntekg kipm pa arpm mlepm namponen Kraiss pa pati, kil kwan paitnpaitn wrongwaillet alpmenen pa plaln ase. ¹⁴ Pa tol Maur Wailen kil kule wurkapm a tu ro ak plan paitnpaitn a mento ntekg ekg talpuln yangkipm titnongket. Kil kwan wurkapm ripa plaln, ak wang a tu alm Jisas Kraiss kai yo kwatingki om kil mo. ¹⁵ Kai yo kwatingki pa Kraiss kil mo pa kil lok arku kwan titnongket a mring maur a nti titnongket. Kil wi nang wail ti uk numpaitn tu kai ikg a tu wrongwaillet a atn knokg ti a kaino ktnong ai yat, pa kil planten tolpa kil atn hep hangken tu ase.

Ampur katnun yangkipm titnongket a melnum yipon pa

¹⁶ Tolpa yatom ampur kipm eln melnum ur namputepm kalpmel ekg kipm al wangkwrije aki kipm al klon aken pa, wa namputepm kalpmel ekg kipm ntekg ekpma wail al atnen wang wail ur aki, atnen ekpma nangnang ur aki, atnen kainil weten a paln pa, wa namputepm kalpmel ekg wang a kipm ark ekg wi yapm. ¹⁷ Kweiur kweiur ripa pa lukglal a kweiur aklahle a akal paln kanukg. Kraiss kil alkil pa yiprokgen a

kweiur kweiur aklahle. ¹⁸ Ake al kipm atning katnun nkgwalpm a tu mla ur ai a rkolepm ye kai tukulein ya wor a kipm hore pa. Tukol tu melnum tiur a arku tu alntu, kalpm ekpma uk wang Maur Wailen pa akplainel tu alntu ti tolpa tu pa wor pake. Aki tukol tu tiur a ari kweiur kweiur tol a Maur Wailen planten aki, tukol hokgwangket worwor pa. Wa tu tiur a kpor klko lein tu maur akwapel a Maur Wailen pa. Plpa tu akepmplain, ekg nte, tu pa nampil nkgwalpm tngklaket paitn alntuen ti a wamparpme nkgwalpm a kat nang tolpa, apm ya wor wrijen apm tu hantil apm tike. ¹⁹ Tu pa nlokgen tu alntu ti kai atn tukulein Krai ti. Krai pa kil tukgunakgen a numpwam wrongwaillet alkilen pake. Numpwam wrongwaillet ti kai almitne atn num a Krai. Ningkli ti kli hore tita ak nampil numpwam wrongwaillet ti ye kai atn wrij yatom nip ak titnongket a Maur Wailen wreitn wor wail.

²⁰ Kipm apm pike mo namponen Krai ase ekg kweiur kweiur peset paitnpaitn a atn knokg ti ase. Yatom titnongket a ya peset a pike kipm katnun atn knokg ti pa ake wa atn wail hangken kipm ti pa, kalpm. Kipm ti hangken yat ase. Tolpa om ampur kipm kai horhanekg katnun pa atn lan atn pa. ²¹ Tol tu lokepm la tolpa, “Ake al kipm wamparpme, ake al kipm al, ampur kipm wam hele.” ²² Pake tolpa kalpm. Pa kweiur kweiur a mento aken kwap atn knokg ti tolti hute. Yangkipm titnongket a arpm knokg ti tolti, pa hi kai plaln. Plpa melnum ti hute la nasepm rowepm tukgunakg lngkep ti tolti. ²³ Tol

tu katnun yangkipm a tu rowepm tukgunakg lngkep pa, tu arku tu alntu atn mehen a arpm mehen akplain plan ak num henen ti tolti. Wa tu uk wleket num alntu ti kalpmel tolti. Tu wrongwaillet arien pa, pa tu la tolpa, pa tu komkiti ariworwor a kpor klko lein Maur Wailen, pake ake ntie titnongket a ak kpor hmpei ipma alntuen ekg tu elnten ipma tingklaket ripa.

3

Krais kil ntekg mento paln weten

¹ Maur wor alkipmen apm pike mo ase, yatom Maur Wailen ntekg kipm pa wreitn atn mlepm namponen Krais ase. Tolpa ti kipm al lok nkgwalpm alkipmen ti ye kai ark ariworwor ekg kweiur kweiur wrongwaillet a atn kaino ha wor ai. Kaino ha wor a Krais kil arpm wam wien a Yan alkilen wi nang wail a atn hep ekg ikghlen kweiur kweiur wrongwaillet. ² Lok nkgwalpm alkipmen ti ye ekg akwonalmpen nkgwalpm worwor a kweiur kweiur kaino ha wor pa tolti. Wa ampur akwonalmpen kweiur kweiur a atn knokg ti. ³ Maur wor alkipmen apm pike mo ase, yatom ti maur wor alkipmen wreitn arpm mlepm namponen Krais, om Maur Wailen lampepm arpm worwor. ⁴ Krais, kil melnum a ukwepm maur wor weten pa kil hi paln ngko wurknong pa, kipm ti yat, kipm hi wa paln ngko wurknong wi titnongket klalen wailmanten namponen kil.

Mento paln kinkpman weten

⁵ Kipm kwan ipma tngklaket wrongwaillet a knokg ti a ak kwap atn kai ipma alkipmen pa. Kweiur kweiur tukul: Kli arku tita aki a kweiur kweiur a tu wi numpaitn aki, kipm ake ntie ekg arku nkgwalpm titnongket a ipma wakrongen tolpa nti kin aki kpman ur hokg pa. Nkgwalpm a wreitn titnongket akal ntekg kuina ur a paitn aki, arikowe arpm wail akal wi kweiur kweiur wrongwaillet a knokg ti. Nkgwalpm a arikowe tolpa pa tukul Maur Wailen alkipmen apm pake. ⁶ Mla ur a ntekg paitnpaitn a tolpa pa, Maur Wailen kil ipma wakget paitn ekg kil, yatom kil hi uk wleket ntekg paitnel kil pa. ⁷ Kipm yat apm pike nkgwalpm tolpa rkolepm yatom kipm atn ntekg kweiur kweiur tolpake.

⁸ Tolpa ti, kipm kwan nkgwalpm wrongwaillet a paitn pa. Nkgwalpm tukul: Ipma wleket, a ipma wreitn ekg er kmel, a ipma paitn, la paitnel ekg kmel ur, la yangkipmek a paitn pa. ⁹ Ampur kipm la yangkipmek ekg akplainel mla ur, ekg nte, kipm apm pike kwan ipma tngklaket a pike kipm ak tolpa yat ase. ¹⁰ Wa ipma alkipmen pa apm wa paln weten ase. Melnum a pike ntekg kipm ti pa, apm kil ntekg kipm paln weten tolpa ye kai pake, ekg kipm hi wi arie a kil pa worwor, yatom hi kipm paln hirhir tukul kil pa yat. ¹¹ Mento a paln weten pa, mento ake wa manet manet, tu Krik, aki tu Juta, tu a pike kwat numpalk, aki tu a ake pike kwat numpalk, tu a ak ek manet manet, aki tu a ha knokg manet manet, a tu a aken kwap kalpmel horhanekg melnum ur, aki tu a ark ak wakrong alntu. Pake Krajs wrij hute pa kil a mento wrongwaillet, yatom apm kil

pa arpm kahor ipma a mento wrongwaillet ti.

Mento ukpma wor ekg wakrongen tita

¹² Maur Wailen kil ukpma wor wakrongen kipm yatom kil kwewepm ekg arpm wri wor ekg alkilen, tolpa ti nikgwalpm alkipmen pa irk tolti: al kipm ipma rein iklin mla ur, rku kipm alkipm ye kinar irpm mehen horhanekg ekg tita, irpm mehen ye kalkut namponen ipma wor.

¹³ Melnum ur akal ukwepm kalkut pa, ampur kipm akalmpe pa, kalpm. Kipm utopen ekg ye kalkut pa namponen ipma wor irpm tolti. Wa kipm nuhurn paitn kuina ur a tu ntekg kul ekg kipm pa. Pati ekg nte Maur Wailen kil pike nuhurn paitnpaitn alkipmen pa ase.

¹⁴ Nikgwalpm wrongwaillet a wet kupm la hel hep pa wor pake, atn hep hangken nikgwalpm wrongwaillet pa pati, kupm la tolpa kipm ukpma wor wakrongen tita. Pa pati ye kipm kai itn hor wrij wa kipm atn titnongket ekg komkiti nikgwalpm wrongwaillet pa ariworwor.

¹⁵ Kipm eln ipma mehen wor a Krai pa itn wail ikghlen nikgwalpm alkipmen pa. Krai kil kwe kipm ti tukol numpwam wrij wrij ur a kai almitne atn num wrij alkilen ti. Yatom kipm irpm mehen ukwor Maur Wailen aklei wang tolti.

¹⁶ Kipm eln yangkipm a laron Krai pa irpm titnongket kahor ipma a kipm wrij wrij. Kipm wi arie a Krai worwor ekg al kipm uk arie a ro tukgunakg lngkep ekg tita a noworel tita ekg al kipm nte ekg katnun ya wor tolti. Wa kipm ik nangnang a hel kai wurkapm a Nangnang a Teipit, wa kipm ik nang ekg ak kat nang a Wailen, wa ik nangnang

weten weten tiur a Maur Wor ukwepm pa. Kipm ik tolpa utopen ik kit nang a Maur Wailen. ¹⁷ Kweiur kweiur wrongwaillet a kipm ntekg pa, kipm ekla aki kipm ik kwap pa, kipm ik tukul kipm ak kwap a Wailen Jisas wa kipm ukwor Maur Wailen, Yan alpmenen pa, kai nang a Jisas pa.

Atn a arpm a melnum a ukpma Maur Wailen

¹⁸ Kipm kin pa, kipm pa itning nungkulkg horhanekg ekg kpman alkipmen pa. Wailen al wi wor lawepm, kil utopen tolpa ekg kipm katnuntel. ¹⁹ Kipm kpman pa, kipm ukpma wor wakrongen tu kin alkipmen pa, ampur kipm ntekgen paitn.

²⁰ Kipm warim pa, kipm itning nungkulkg horhanekg a manjan alkipmen pa ekg kweiur kweiur a worhampe. Wailen kil al wi wor lawepm kporn yangkipm ekg kipm ak tolpa.

²¹ Kipm yantin pa, ampur kipm er kle tu warim alkipmen pa aklei wang, tolpa pa tu ipma kalkut ekg arpm a tu pa wa paitn.

²² Kipm melnum a ak kwap kalpmel pa, itning nungkulkg ik kwap kuina ur komkiti wakrong a melnum tukgunakgen alkipmen pa riworwor. Ake la nak kipm akplain kai ikg akil pa ekg al kil wi wor lawepm pa. Kipm kirk ekg Maur Wailen, yatom kipm ik kwap namponen nikgwalpm aklahle. Kipm ik tukul a kipm ak ekg Wailen Jisas. ²³ Tolpa ti, kuina ur a kipm ntekg pa, kipm ik namponen nikgwalpm aklahle, tol a ak ekg Wailen Jisas pa, ake ak ekg melnum pa.

²⁴ Ti kipm ari tolpa, kipm hi wi kweiur kweiur

worwor a Maur Wailen kil numprampen elnth a ekg akalmpe kwap a kipm ak ekg Wailen pa. Pa ake tol kipm ak ekg melnum ur tolti, kalpm, pa kipm ak ekg Wailen Jisas Krais. ²⁵ Mla ur a kil ntekg paitn pa, kil hi wi paitn akalmpe paitn a kil alkil ntekg pa. Maur Wailen ake al wi wor la ur, a wa wi paitn la ur, kalpm.

4

¹ Kipm melnum tukgunakgen pa, kipm ikghlen tu melnum a pike kipm armpen ekg akal aktepm kwap pa nipet yekriworwor. Ekg nte, kipm ti wa ari yat melnum tukgunakgen a ikghlen kipm ti pa arpm kaino ktnong ai.

Ampur kipm elnten a kipm ropon Maur Wailen pa tolpa kai

² Ampur kipm elnten a kipm ropon Maur Wailen pa. Kipm irpm wonirpme nikgwalpm irke ukwor kil a ropontel aklei wang tolpa kai pake. ³ Wa kipm ropon Maur Wailen ekg kil aklin men ti yat, ekg Maur Wailen kil kuleinjo ya ekg al men laron nikgwalpm hampen a la kiti Krais pa. Apm yiprokgen ripa yatom tu wiopm ye hor arpm wan tipmning kil. ⁴ Kipm ropon Maur Wailen pa ekg kil iklin kupm ti ekg kupm laron yangkipm a kil ti wurknongket wor komkiti nikgwalpm a kil alkil ti.

⁵ Kai kuin a tu a ipma wekg pa, kipm itn wonirpme. Ya ur wokget ekg kipm pa, ampur kipm eln wang ur pa kai kalpmel pa, kalpm. Kipm aklei wang plan nikgwalpm wor a Maur Wailen. ⁶ Kipm akal ekla namponen tu mla ur

pa, kipm ekla mehen namponen nkgwalpm wor, tukol nokg a ak rato ekpma kai nokgij wor. Wa al kipm pa wa arie ya a akalmpe ropon a tu wrongwaillet pa yat.

Pol kil kwa Onesimus kai Kolosi namponen Tikikus

⁷ Tikikus pa hi la nasepm worwor kuina ur wrongwaillet a paln ekg kupm atn kil. Kil yek pa wasok alpmentoen kai nang a Krai. Wa kil melnum akwapel wor a ntio ak kwap a Krai atn titnongket. ⁸ Tolpa yatom ti kupm akal kwa kil kaintepm ekg al kil hi la nasepm kuina ur a palnto atn kul kil, ekg al kil ak titnongketel kipm. ⁹ Wa kupm hi kwa Onesimus ntiel kaintepm pake. Kil yek melnum wor a horhanekg a nkgwalpm arke wa wasok alpmentoen kai nang a Krai. Kil pa apm melnum wrij ur a kipm alkipm Kolosi pake. Hi tuwegk la kiti nasepm kweiur kweiur wrongwaillet a paln atn ti.

Pol kil ukwor tu Kolosi

¹⁰ Aristarkus, melnum wor ur alkupm a mentekg arpm wan tipmning kil namponen Mak, melnum a Parnapas, tuwegk ukwor kipm. Pike kupm la nasepm hep ase tolpa, tol kil kaintepm pa, kipm utopen ekg wiyel ye kai wan pa, om ikghlntel yekriworwor. ¹¹ Jisas, nang wompel alkilen pa kwe la tolpa Jastus, kil pa yat wa ukwepm wor. Kai kuin a tu Juta pa apm tunten melnum wraur apm pake, tunten atn ntiopm ak kwap laron yangkipm wor a la Kingdom a Maur Wailen. Wa wailmanten pa pati tunten wor ekg ak titnongketel kupm ti.

¹² Epapras, melnum alkipmen pake, kil wa ukwepm wor yat. Kil melnum akwapel a Kraiss Jisas. Kil aklei wang ropon Maur Wailen titnongket ekg akal kil ak titnongketel kipm pa ekg kipm paln kinkpman wri wor ekg atn titnongket komkiti nikgwalpm wakrong a Maur Wailen tolti.

¹³ Aklahle wrijen, kupm alkupm ti pike atning ari a kil ak kwap wail ekg aklin kipm wrong kinkpman a Maur Wailen a ark kai pa wa tu a ark kai ha wail Laotisia a Hierapolis pa. ¹⁴ Luk, melnum yek wor alpmentoen, melnum a ak kwap a hi numpet, ekg Temas, tuwekg pa wa ukwepm wor yat.

¹⁵ Kipm la nasi muitnwar yanipopm a kupm kai ha wail Laotisia pa wa la nasi kin ur, nang a kil pa Nimpa, pa namponen tu wrong kinkpman a Maur Wailen a kor tita ekg kat nang a Maur Wailen kai wan a kil pa la tolpa, kupm ukwen wor. ¹⁶ Kipm klein wurkapm kil ekg kipm wrong kinkpman a Kolosi pa, atning plaln pa, wa ye kai ekg tu klein nasi tu wrong kinkpman a Maur Wailen a Laotisia pa. Wa wi ur manet pa a pike kupm ro kai ekg tu Laotisia pa, wa ye kul klein ekg nasi kipm Kolosi ti. ¹⁷ Kipm la nasi Arkipus pa la tolpa, ekg kil ikghlen kwap a pike Wailen ukwel pa ik yekriworwor tolpa kai.

¹⁸ Kupm Pol, kupm alkupm ro yangkipm ketn rikil, ak wam alkupmen ekg ukwepm wor. Ti ampur kipm wonhmiten kupm a arpm wan tipmning kil. Kupm ropon Maur Wailen ekg al kil reinjepm. Yangkipm akupm apm kai tolpake.

Wurkapm a Maur Wailen
Urim: Wurkapm a Maur Wailen Portions
Sampela hap Nupela Testamen long tokples Urim
long Niugini

Copyright © 2016 Wycliffe Bible Translators, Inc.

Language: Urim

Dialect: Kalpm

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-07-12

PDF generated using Haiola and XeLaTeX on 11 Nov 2022 from source files dated 20 May 2021

e931a635-6ee0-5a13-abfb-426db1485eac